



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 13. 2018

Rendimentu riba Invershon

Parti 1

No ta trata di kuantu sèn bo ta gana, pero di kuantu sèn bo ta keda kuné, kon duru bo sèn ta traha pa bo, i pa kuantu generashon bo ta keda kuné.”

Robert Kiyosaki

Kiko ta e diferente maneranan ku mi por gana sèn riba mi invershon? Kon mi por hasi un ganashi? Tin diferente manera òf ta un solo manera tin pa mi gana sèn ora mi hasi un invershon? Mi por gana interes riba akshonnan? Kon e ta funshoná? Realmente, tin hopi opshon di invershon disponibel i kada un di e opshonnan aki tin su maneranan spesífiko den kua bo por hasi ganashi i de bes en kuando pèrdidan.

Un rendimentu riba e invershon ta e ganashi òf pèrdida ku un invershonista ta hasi riba su invershon. E rendimentu aki por ta positivo òf negativo, e por ta basta haltu òf e por ta hopi abou. Ora un rendimentu ta negativo, ker mèn ku bo a hasi un pèrdida riba bo invershon i ku bo lo haña ménos sèn bèk ku bo a invertí inisialmente. E probabilidad di hasi un pèrdida den bo invershonnan inisial ta pusha e nivel di riesgo di e invershon mes. Pues, mas haltu e riesgo di eksperensia un pèrdida, mas haltu e riesgo relashoná ku e invershon ei. Naturalmente, lo kontrali ta bèrdat, mas abou e chèns ku lo bo hasi un pèrdida, mas abou e riesgo di e invershon ta. Den

finansa, e rendimentu total ku un invershonista logra, por wòrdu di split den dos fuente prinsipal – oumento di balor di kapital i entrada di kapital. Laga nos eksplorá kada un na su turno.

Oumento di balor di kapital ta e kresementu den e balor di bo invershon dor di un subimentu den e preis di e papelnan di balor ku bo a invertí aden. Por ehèmpel, laga nos bisa ku bo tin mas o ménos \$ 10,000 pa invertí den mei 2016, i bo a opta pa kumpra akshonnan, akshonnan di Apple pa ta eksakto pasobra bo a tende ku e kompania lo bai bon den futuro. Riba 13 di mei 2016, un akshon di Apple ta bal \$ 90.52 pa kada unidat di akshon. Pues, riba 13 di mei 2016, bo por kumpra 110 unidat di akshon di Apple pa un invershon total di \$ 9,957.20. Pa hasi esaki simpel, mi ta asumí ku bo no a paga niun gastu pa kumpra e akshonnan, loke den realidat normalmente no ta e kaso. Riba 5 di òktober 2018 e preis di kada akshon di Apple a oumentá pa \$ 224.29. Si bo a keda ku bo invershon te ku 5 di òktober 2018 bo 110 unidatnan di e akshonnan di Apple lo ta bal \$ 24,671.90. Bo invershon a krese di \$ 9,957.20 pa \$ 24,671.90; esaki ta un subimentu, òf mas apropiá, esaki ta un oumento di kapital di \$14,714.70. Esaki ta e preisnan berdadero di e akshonnan di Apple pa e fechanan duná. No malu den términonan di rendimentu, bo no ta kere?

Di otro banda, e parti di entrada di kapital di e rendimentu total di un invershon ta representá un fluho di entrada periódiko ku ta wòrdu pagá na e invershonista. E pagonan aki ta proveé un fluho di entrada ku ta wòrdu pagá na e invershonista, sea riba un base mensual, pa kuartal, semi - anual òf anual. Por ehèmpel, esaki por ta entrada di dividendo den kaso di akshon, entrada di interes den kaso di bono i entrada di hür den kaso di inmueble.

Konsekuentemente, e rendimentu ku un invershonista ta gana ta dependé signifkamentemente di e tipo di invershon ku e ta hasi, sea ta bono, akshonnan, inmueble, divisa òf materianan prima. Kompañia nos den e próksimo publikashon kaminda nos lo diskutí e diferente posibilidatnan di rendimentu den e opshonnan di invershon prinsipal di bono, akshon, inmueble i fondonan mutuo.

Sigui Skina di Invershonista pa tur kos ku bo mester sa tokante Kreashon di Rikesa!

E editorial aki a wòrdu presentá na bo pa e DCSX ku kolaborashon di Vertex Investments.

Outor di e publikashon aki: Stephanie Shaw CFA, MBA.



dcsx.cw

vertexinv.com